

ЦЭРГИЙН ХҮРЭЭНИЙ БА ХАРУУЛЫН АЛБАНЫ ДҮРЭМ

Энэ дүрэм нь цэргийн хүрээний ба харуулын албыг зохион байгуулах, харуулын албыг гүйцэтгэж байгаа цэргийн алба хаагчийн эрх үүрэг, харуулын дотоод журам, харуулыг хүлээн авах, халалцуулах, шалгах үйл ажиллагааг тодорхойлно.

НИЙТЛЭГ ҮНДЭСЛЭЛ

1. Цэргийн хүрээ нь Нийслэл болон орон нутгийн хилийн дээсэд багтаж, байнга буюу түр байрласан цэргийн хотхон, ангиас бүрдэнэ.

Цэргийн хотхон нь зэргэлдээ буюу ойролцоо байрласан хэд хэдэн анги, салбараас бүрдэнэ.

2. Цэргийн хүрээний алба нь тус хүрээнд багтах цэргийн ангиуд, алба хаагчдыг нэгдсэн ажиллагаанд зохион байгуулалттайгаар оролцуулах, анги, салбаруудын үндсэн үүргээ биелүүлэх нөхцөлийг бүрдүүлэх, бие бүрэлдэхүүнээр сахилга дэг журмыг мөрдүүлэх зорилготой.

Харуулын алба нь Байлдааны туг, цэргийн болон улсын чухал объект, зэвсэглэл, цэргийн техник, материал хэрэгсэлийн агуулахууд, бусад байгууламжийн харуул, хамгаалалтыг хэрэгжүүлэх зорилготой.

3. Цэргийн хүрээний нутаг дэвсгэрийн заагийг Монгол Улсын Засгийн газраас тогтоох ба түүнийг хүрээний нийт бие бүрэлдэхүүн мэддэг байна.

4. Хүрээний албыг зохион байгуулах тухай хүрээний даргын тушаалыг тухайн хүрээнд багтдаг цэргийн бүх анги, цэргийн алба хаагч бүр биелүүлэх үүрэгтэй.

5. Цэргийн алба хаагч бүр хүрээний ба харуулын албаны үүрэг гүйцэтгэж байгаа бие бүрэлдэхүүнийг хүндэтгэн туслалцаа үзүүлэх үүрэгтэй.

6. Цэргийн алба хаагч эргүүл, тээврийн хяналтын алба, харуулын бүрэлдэхүүн албан үүргээ зөрчиж байгааг мэдвэл энэ тухай цэргийн зохицуулагч, цэргийн ангийн захирагч /жижүүр/-д яаралтай мэдэгдэж, өөрийн шадар захирах даргад илтгэнэ.